

No. 9

I

DISCOVRS VERITABLE

*de ce qui s'est passé au Parlement, en suite
de l'Arrest de la Cour du 28. Mars der-
nier, & des remonstrances.*

L'AN mil six cens quinze, le Vendredy 27. iour de Mars, aucuns de Messieurs des Chambres des Enquestes, jusques au nombre de dix, deputez deux de chacune chambre, vindrent en la Grande Chambre du Parlement, prier Monsieur le premier President, d'assembler toutes les Chambres, pour deliberer & aduiser sur les Remonstrances que long temps auparauant on auoit resolu de faire au Roy: Ce qu'il leur accorda, & à l'heure mesme fit appeller par toutes les Chambres de la Tournele, de l'Edict, des Enquestes, & des Requestes, Estans tous assemblez, Monsieur Fayet President en la premiere chambre des Enquestes, proposa qu'ils auoient desiré & demandé l'assemblée des Chambres, sur ce que le Roy ayant promis à la Cour de parlement, quelque temps y auoit, de ne faire point de response aux Cahiers qui luy seroient presentez par les Deputez des trois Estats de ce Royaume, ny aucune resolution, sans ouïr son Parlemēt & entendre ce qu'il auoit à luy remonstrer, Qu'ils auoient estimé estre temps & à propos, d'aduiser ce que la Cour pouuoit faire, & comment elle se deuoit gouverner en ce fait de Remonstrances tres-necessaires en l'Estat auquel estoient les affaires. Sur ceste proposition l'on comença à deliberer en la maniere accoustumée iusques à dix heures, lesquelles sonnées, la deliberation fut remise au lendemain: auquel iour de Samedy vingt-huictiesme, elle fut continuée iusques à pareille heure, & n'ayant

peu estre paracheuée, par l'aduis & consentement de toute la compagnie, remise à l'apresdinée. Toutes les opiniōs recueillies, allans les vnes, & toutes, à tres-humbles Remonstrances au Roy, d'oüyr son Parlement sur ce qu'il auoit à luy faire entendre pour son seruice, son auctorité, sa personne, & son Estat : Les autres y adioustans de le supplier avec tout respect d'obeyssance, & d'humilité qu'il luy deuoit, & luy auoit tousiours rendu, de prester l'oreille aux Remonstrances que ceux de son Parlement pensoient en leurs consciences estre obligez de luy faire, sur les desordres qui estoient en son Estat, & pour la conseruation de sa personne, de son authorité Royale, repos & tranquillité de ses subjects : où attendre qu'il vint au Parlement, comme le bruit estoit lors qu'il y vouloit venir dans deux où trois iours ; & tenir les Remonstrances prestes pour les luy faire librement, vertueusement, & courageusement entendre, sinon de supplier tres-humblement de commander à Monsieur le Chancelier, Messieurs les Princes, Pairs de France, & Officiers de la Couronne, ayans seance & voix deliberatiue au Parlement appelez, d'y venir pour ouyr les propositions qui s'y feroient pour son seruice, & le bien de son Estat : D'autres qu'il seroit bon de les y conuier. En fin estant fort tard, la Cour se leua, demeurât aresté en general que les Princes, Pairs de France, & Officiers de la Couronne, ayans seance & voix deliberatiue au Parlemēt, seroiēt inuitez de se trouuer en la Cour, pour avec monsieur le Chancelier aduiser sur les propositions qui y seroient faites pour le seruice du Roy. L'arrest des le lendemain fut dressé par le Greffier, & vœu par mōsieur le premier President, fut leu apres toutes les Chambres assemblées, le lundy, en ces mots

La Cour, toutes les Chambres d'icelle assemblées, a arresté, sous le bon plaisir du Roy, que les Princes, Ducs, Pairs, & Officiers

de la couronne, ayans seance & voix deliberative en icelle, estans de present en ceste ville, seront inuitez de se trouver en ladicte Cour, pour avec monsieur le Chancelier, toutes les chambres assemblées, adviser sur les propositions qui seront faictes pour le service du Roy, soulagement de ses subjects, & bien de son Estat.

Ceste resolution fut dès le Samedy au soir portée au Louvre, cōme l'on dit en gros, & non aux termes qu'elle fut dressée, par quelqu'un de la compagnie, & par vne espece de trahison & de malice, on la fait soudain entendre au Roy & à la Royne: on leur imprime facilement que le Parlement seveut mesler des affaires d'Estat, entrer en cognoissance du gouvernement d'iceluy, donner Conseil sans en estre requis; que c'est vne apparente entreprise sur son autorité, luy estant en ceste ville de Paris, & pour aigrir l'affaire, que c'estoit toucher à la Regence de la Royne, & la vouloir controller. Ce qui fut de premier abord si bien receu, que par vne apprehension de plus grande ruineur, l'on leur donna conseil d'envoyer faire desfences à vn Prince, & quelques Pairs, de n'aller point au Parlement, s'ils en estoient requis ou conuiez: ce qui fut fait.

Le Dimanche 29. le Roy manda au Procureur General, & ses Aduocats, de se trouver au Louvre sur le midy, où ils se trouuerent seuls contre leur opinion, estimans que l'on eust mandé Messieurs les Presidens, & quelques vns des Conseillers: où Monsieur le Chancelier parla à eux par le commandement du Roy.

Le lundy 30. iour du mesme mois de Mars, les gens du Roy firent sçauoir à la grande Chambre qu'ils auoient à parler à la Cour de la part du Roy. Sur ce Monsieur le premier President fait appeller aux Chambres par le Clerc du Greffe. La Cour estant assemblée, monsieur Seruin accompagné de Messieurs Molé Procureur General, & le Bret

L'Aduocat du Roy, rapporta que le iour d'hier ils auoient
 esté mandez au Louure, où pour obeyr au commande-
 ment qui leur en auoit esté fait par le Roy, ils se trouuerēt
 seuls: Qu'estans entrez au Cabinet, monsieur le Chance-
 lier y arriva, qui leur dit, que le Roy les auoit mandez
 seuls, sur le subiect de la deliberation & arrest fait au Par-
 lement le Samedy precedent: que le Roy & la Royne sa
 mere, auoient eu mescontentement sur ce qui leur auoit
 esté rapporté; qui estoit, que la Cour auoit ordonné que
 les Princes, Pairs, & Officiers de la Couronne, seroient
 inuitez & conuoez au Parlement pour aduiser au gou-
 uernement du Royaume: à quoy il respondit qu'ils n'en
 auoient pas tant sceu que cela, mais auoient bien appris que
 la Cour s'estoit assemblée pour resmoigner vne bonne &
 sincere affection, ayant pour seul but & vnique vœu, le sa-
 lut du Roy & de l'Estat. Que sur ces propos le Roy & la
 Royne entrerent au Cabinet, & là s'estans assis la Royne
 leur dit, qu'ils auoient esté aduertis de diuers langages te-
 nus en ceste assemblée des chambres de la Cour, par les-
 quels l'autorité du Roy auoit esté offensée, & que c'es-
 toit vne entreprise nouuelle: A quoy il fit responce qu'ils
 n'auoient pas esté presens à la deliberation, & qu'ils ne se
 trouuoient qu'au commencement pour requérir ce qui
 est necessaire, & qui regarde le public; & qu'apres ils se re-
 tirent: bien auoient-ils esté sommés de proposer ce qui
 leur sembloit vtile & conuenable en ceste saison pour son
 service, & vtilité publique, comme ils ont tousiours fait
 selon les occurences; mais ayans autresfois dit ce qu'ils
 estimoient estre de leur deuoir, ils ne s'estoient ouuerts
 d'auantage, ains auoient supplié la Cour de se resouenir
 qu'ils auoient cy deuant proposé iusques à trois fois, qui
 estoit ce qu'ils pouuoient faire, ne voyans pas encores la
 declaration sur les Remonstrances & supplications à luy

faictes par les Deputez des Estats : Et sur ce, la Cour auoit delibéré de donner aduis à sa Majesté de ce qu'elle croyoit estre de son service : ce qu'elle n'auroit fait pour entreprendre sur l'autorité Royale, ains ceux qui ont opiné, auoient déclaré leur intention estre tant seulement de faire quelque ouuerture pour le bien de son service, & soulagement de ses subiects; & aussi pour iustifier la constante foy de tous les Officiers de son Parlement, & de chacun d'eux en la presence des Princes, Pairs, & autres qui se trouueroient à la deliberation tant desirée, en presence de Monsieur le Chancelier : & affin de leur les mauuaises impressions qu'aucuns luy auoient voulu donner d'eux, & à la Royne sa mere, interpretant sinistrement & taschant de faire mal prendre leurs volontez, lesquelles ils pouuoient asseurer avec verité, n'auoir esté meues pour aucun dessein autre que de son seruice, & s'ils pensoient qu'il fust mal content d'eux, il n'y a rien qui les peust fascher d'auantage, comme estans gens d'honneur, qui ne cederont iamais à ame viuante, pour ce qui est de la deuotion qui luy est deuë, & ne peuvent auoir plus grand malheur que de trotter sur les levres des parleurs, & sur le diffame des hommes qui n'ayment pas la iustice, lesquels s'efforcent de les blasmer & diminuer: car s'il tomboit en l'opinion des hommes qu'ils eussent encouru sa disgrace, demeurants blesez comme ils feroient, son autorité y seroit aussi grandement interessée, veu qu'ils ont tousiours esté zelateurs & defenseurs de sa puissance souveraine, selon le pouuoir qu'ils ont de sa main, qui est vn pouuoir venant de luy ordonné de Dieu pour regner; le supplians les auoir pour ses tres-humbles & fidels suiets & seruiteurs, qui n'ont autre fin en leurs pensees, paroles & actions, que la gloire de la fidelité à leur Roy, duquel seul depend l'autorité qu'ils ont d'e-

xercer leurs charges. A ces propos le Roy repartit, qu'il assembleroit son Conseil pour y aduifer: Et la Roynne prenant la parole, dit que presentement l'on feroit resolution de cétaffaire au Conseil du Roy; lequel s'estant assemblé à l'instant, le Roy leur commanda d'entrer au grand Cabiner, on estoient plusieurs Princes & Seigneurs de son Conseil, & leur dict; *Tenez vousicy pour entendre ce que i'aduiferay sur ce que ie vous ay parlé.* A quoy ils auroient dict; *Sire, nous sommes à vos pieds pour vous obeyr, & ayans l'honneur d'estre de vostre Conseil, ferons ce qu'il vous plaira de nous commander en autre rencontre. Mais s'agissant d'une deliberation faicte en vostre Parlement, puis que nous sommes du corps d'iceluy, il vous plaira nous dispenser d'estre en un lieu, où si quelqu'un parloit contre le Parlement, nous ne le deuriens ny pourrions escouter: ains serions obligez de parler pour l'autorité de l'Arrest, Vous suppliant nous conseruer pour rendre le fidelle seruice que nous deuons en nos Offices.* Sur ce le Roy trouuant bon ce qu'ils auoient proposé, pour excuse, leur commanda se retirer au petit Cabiner: à quoy obeyssans, apres auoir attendu vne heure & plus, furent appelez au lieu ou le Roy auoit tenu Conseil: Et lors approchans de luy & de la Roynne sa mère, leur fut dict par le Roy (la Roynne, Monsieur le Chancelier, & eux seuls,) *Je vous ay fait rentrer pour vous commander ce que i'ay aduisé en mon Conseil, que vous direz de ma part à ma Cour de Parlement, voulant que ce soit vous qui luy portiez la parole.* Surquoy il supplia le Roy de les en excuser, & commettre ces paroles de mescontentement qu'il monstroist auoir à autres qu'à eux; luy remonstrants qu'ils estoient à ses pieds, & seroient tousiours prests de s'y rendre à toutes heures qu'il luy plairoit leur mander pour luy obeyr; mais qu'ils estoient aussi tous les iours aux portes du Iugement de la Cour, la necessité de leurs charges les y attachât, & estreignant d'y requerir

ce qui est de son seruice, & seconder les bonnes intentions de son Parlement, lequel ils auoient recogneu & recognoissoient plein de fiance, courageux & volontaire comme necessaire, à la conseruation de son autorité & prosperité de l'Estat; Et qu'il estoit besoin de les maintenir en la crovance qu'ils deuoient auoir en ceste compagnie. La Royne leur dit; *Ce vous sera gloire d'obeyr au Roy.* à quoy il se ressentit, contrainct de respondre; *Madame, nous auons ceste gloire d'obeissance toute prestee.* Et voyans quelques vns s'approcher pour escouter, mesmes vn Prelat des plus affectionnez à l'opinion nouuelle de la superiorité du Pape sur les Roys, mesmes de France, il esleua sa voix, disant; *Nous sçauons dès long temps rendre ce que nous deuons au Roy, & que luy doiuent tous autres qui nous entendent, de quelque qualité, condition, & dignité qu'ils soient & puissent estre, auxquels nous auons fait & ferons la leçon d'obeissance, leur donnant le premier exemple pour recognoistre que vostre Maisté, Sire, tiert sa Couronne & souueraineté immédiatement de Dieu, & ne depend d'autre pour ce qui est de la puissance temporelle, comme vostre Cour de Parlement l'a tousiours soustenu, & nous avec elle, dès long-temps nourris & confirmez aux maximes de la France: Et luy particulierement qui parloit, dist au Roy; Sire, ayant depuis plusieurs annees, qui sont proches de la trentième, seruy & tenu ferme en la fidelité & cognoissance qui est deüe à vostre pouuoir souuerain, dont entre tous les François ceux de ceste Cour de Parlement sont des plus signalez, nous continuerons avec eux, & perseuererons en l'affection de tres-humbles, & tres-fidels subiects & seruiteurs de vostre Maisté: il leur fut commandé en fin de dire à la Cour trois choses;*

La premiere, qu'il estoit irrité de la deliberation dernière, dont la Royne sa mere, & Monsieur le Chancelier leur ont dit les raisons declarees en son Conseil, qui sont: *Que luy estant à Paris la Cour de Parlement n'auoit deu*

s'assembler pour deliberer d'affaires qui vont à l'Estat, ny à cette fin inuiter les Princes, Pairs, Seigneurs, & autres ayants seance au Parlement, sans luy en auoir parlé: Qu'estant maieur par les loix de France, bien que tout autre de ses subiects fust mineur en son aage; neantmoins Dieu ayant versé en luy de plus grandes grâces qu'aux autres hommes, il deuoit estre tenu pour plus vertueux, & que sa puissance n'estoit en rien moindre que celle de ses predecesseurs: Que cette conuocation ordonnee par la Cour, ores que Monsieur le Chancelier fust requis de s'y trouuer, ne se pouuoit faire par le mouuement du Parlement ny autrement, que par lettres patentes de sa Maiesté: cela estant de son seul & souverain pouuoir.

Secondement, que le Roy vouloit qu'on luy enuoyast le registre de la deliberation, & qu'eux luy portassent l'arresté de la Cour. Et pour troisieme commandement; qu'il defendoit à la Cour de passer outre à l'exécution de l'arresté: Ce qu'il leur enioingnit tres-expressement de dire à la Cour, & luy en rapporter response. Adiousta qu'ils auoient remarqué & recogneu quelque indignation en la face du Roy qui leur donna de l'apprehension: Et ne peurent persuader, ny obtenir cette grace, d'estre déchargez du commandement du Roy, quoy que par plusieurs fois ils eussent reïteré cette supplication & leur excuse, laquelle fit monter la cholere au visage de la Royne, quand elle leur dit; *Ce vous sera gloire d'obeyr au Roy.* Et dit encore; *C'est ce que vous auez à représenter.* Et pour ce qui estoit d'eux, estimoit deuoir adiouster à ces paroles, qu'ils remarquerent aux propos de plusieurs Seigneurs qui parlerent à eux au Cabiner, apres auoir pris congé du Roy, que quand la Cour apporteroit le tesmoignage de ses bons vœus sur l'intérest du Roy & du public,

public, y allant par tres-humbles remonstrances, comme il faut parler aux Roys en paroles de foye avec humilité, elle en pouuoit esperer du fruit, croyants que cette compagnie imitant la sapience, qui crioit aux portes de la iustice, & vsant de prudence & respect qu'elle doit & à accoustumé rendre à la personne & puissance du Roy, se conseruera au rang & pouuoir qu'elle a eu des Roys: lequel n'est moins grand que celuy du Senat de Rome, qui fut digne que Ciceron parlast deuant luy, & que les Catons y fissent de graues & serieuses propositions pour le bien de la chose publique. Et ainsi la Cour seroit louée par toute la France, & par tout le monde. Et pour le regard, feront ce qu'ils doiuent en seruant le Roy, & voyants son auctorité entiere, comme elle est, pour maintenir celle de la Cour, de tout leur pouuoir, & la menager par tel temperament & œconomie en tous subiects, qui s'offriront, que comme la volonté en la Cour, & en eux, en toutes actions honorables, l'occasion puisse paracheuer ses œuures & les leurs, selon l'obligation des consciences & au contentement du Roy & de tous ses fidels subiects: Et par ce vœu, finissant ceste action, qui recommencera toutes les autres qu'ils aurôt à faire, supplia la Cour s'ils n'auoient pas fait tout ce qu'ils voudroient bien, qu'ayans recueilly tous leurs esprits pour satisfaire à leur deuoir en ce que ils pouuoient luy pleust se tenir satisfaiete d'eux: & qu'ainsi qu'au temple de Delphes y auoit vne inscription, Sacrifie selon ton auoir, & le vray Dieu mesme se contente des oblations qu'on luy fait selon sa puissance, qu'elle voulust receuoir de ses bonnes mains ce qu'ils luy offroient auourd'huy, qui est la continuation d'honneur & de seruice à la compagnie.

Les gens du Roy retirez, M. le premier President mit

en deliberatiō ce qui estoit à faire sur ce rapport, en laquel le chacū regretta ce mal'heur de voir que sās subier ny iuste occasiō, l'on representoit le Roy indigné, offensé, choleré, irrité contre son Parlemēt, & sur des rapports du tout faux, & cōtre l'intentiō d'iceluy: veu qu'ē toute la deliberation precedēte, si mal prise, & malicieusemēt destournée en mauuaise part, nul n'auoit oublié le respect & l'obeissance deuē au Roy, sans la volonté duquel nul n'entendit ny ne pensa d'executer l'arresté: au contraire, qu'il seroit supplié de le trouuer bon: que cela faisoit inger qu'il y auoit des interests particuliers meslez, de ceux qui auoient preueni les aureilles du Roy & de la Roïne, mal affectiōnez au Parlement & à la Iustice: Et peut estre aucuns apprehendans les Remonstrances, les poufsoient à cette indignation pour destourner vn orage de plainctes qui pouuoit tomber sur eux, & fut veu vn tresgrand tesmoignage de regret en la compagnie, de ceste action. En fin apres plusieurs bons & graues discours & opinions, l'aduis commun fut de satisfaire au commandement que les gens du Roy auoiēt apporté, & qu'eux mesmes portassent la responce au Roy, & l'arresté de la cour pour luy donner à cognoistre que cela n'auoit esté ny proposé ny arresté que sous son bon plaisir, & non par entreprise sur son autorité, comme l'on luy à voulu persuader contre toute apparence de verité: Que la Cour scauoit trop bien que cela ne se pouuoit ny deuoit faire, que ce seroit vne temerité denuée de toute prudence, dont elle n'a point encores esté blasmee. Ainsi fut deliberé que l'arresté seroit mis és mains des gēs du Roy signé du greffier pour le porter au Roy selon sa volonté, & furent chargez de représenter au Roy combien son Parlement resentoit de douleur & d'ennuy d'auoir esté accusé ou plustost calomnié vers luy, d'entreprise sur son auctorité, &

d'auoir seulement oüy dire qu'il estoit indigné & choleré contre luy; & le supplier de ne croire point ceux qui infidèlement & contre verité luy rapportent les choses autrement qu'elles ne sont : qu'il ne trouuera iamais en cette compagnie que respect, tel qu'il luy est deu, tres-humble obeissance, tres-fidelle seruice, & tres-vertueux courage au bien, repos & tranquillité de son Royaume, & conseruation de sa personne sacree.

Le Mecedry premier iour d'Auril, les chambres furent assemblees, & les gens du Roy mandez pour faire leur rapport de ce qu'ils auoient fait suiuant la deliberation du iour precedent, & comme il auoient executé ce dont la Court auoit chargez. Monsieur Seruin accompagné de ses deux collegues, dist qu'hier à l'issuë de l'audience du matin, ils furent au Louure trouuer le Roy en sa petite chambre, où il estoit assis, & pres de luy, la Roynes sa mere accompagnez de Monsieur le Chancelier, & plusieurs Seigneurs, qu'il luy dist; *Sire, comme nous deuons l'obeissance de fidels subiects à vostre Maiessté, ayants receu le commandement qu'elle nous fist Dimanche dernier, nous fismes entendre à vostre Court de Parlement ce qu'il vous pleut nous dire, & de quoy auons à vous rendre fidel compte: Et luy auons representé vos paroles, lesquelles ouyes nous auons remarqué en tous ceux de la compagnie vn extreme desplaisir de vous voir irrité à l'encontre d'eux, se ressouuenans sans cesse d'auoir bien fait, & donne exemplé d'obeissance à tous vos subiects, n'estimans pas deuoir encourir vostre indignation. En fin faisant entendre que vous voulez sur toutes choses maintenir & conseruer vostre autorité, & procurant enuers vostre Court, qu'elle fist vne bonne resolution pour le bien & contentement de vostre Maiessté, ayant interest de l'auoir propice & favorable, pour se rendre aussi utile qu'elle est necessaire au seruice qu'elle vous doit, nous auons esté chargez par elle de vous apporter l'arresté fait par elle Samedy dernier sous vostre bon plaisir, & vous dire qu'elle n'*

rien si cher ny si recommandé que la conseruation de vostre puissance souveraine & de vos bonnes graces: sans lesquelles ious vos Officiers en cette compagnie, vos tres humbles, tres-affectionnez & fidels seruiteurs, ne pourroient faire leurs charges honorablement ny vtilement, vous supplie tres-humblement recevoir l'arresté comme ayant esté fait d'un cœur droit, & non avec intention d'entreprendre chose contre vostre autorité. Aquoy le Roy & la Roynne fai sans demonstration d'auoir quelque satisfaction par ces mots, *Soubs le bon plaisir du Roy*, auroit pris l'arresté de leurs mains, & dit qu'il le verroit, & au premier iour feroit en dre sa volonté à sa Cour de Parlement.

Le Ieudy neufiesme iour d'Auril, l'audience leuee, trois de Messieurs les Presidens des Enquestes vindrent trouuer Monsieur le premier Presidēt, & luy dirent, que Messieurs des Enquestes desiroient quel'on aduisast s'il seroit pas bon de supplier le Roy qu'il luy pleust faire quelque response au Parlement, suiuant la promesse que longtēps y auoit qu'il luy auoit faicte, & luy remontrèrent qu'il estoit besoin & necessaire de le sçauoir, & qu'il ne seroit honneste que les deliberations demeurassent sans quelque effect. Il leur fit response qu'il failloit y aduiser; & sur ce se retirerent tous. Cela fut tout incontinent porté au Louure: Et le mesme iour Messieurs les Presidens, quatre des plus anciens de la chambre, des Presidens & Conseillers des Enquestes & Requestes, furent mandez par le Roy de se trouuer au Louure sur les quatre heures où ils se trouuerent.

Le Vendredy dixiesme au matin, monsieur le premier President fit appeller aux Chābres, lesquelles assemblées, & les gens du Roy seuls, il rapporta comme le iour precedant ils auoient esté mandez se trouuer au Louure sur les quatres heures, & que estans arriuez, & introduicts en la Chambre du Roy, il leur dist ces mots; *Messieurs, puis que vous auez voulu sçauoir ma response sur vostre arresté que mes*

gens m'ont apporté, Monsieur le Chancelier la vous fera entendre. Lors monsieur le Chancelier leur dist ; que le Roy estant bien aduertty qu'aucuns de la compagnie ont desiré d'entendre sa responce, encores qu'il fust conseillé par bonnes & raisonnables considerations, la différer : neantmoins il auoit charge de nous dire qu'il est fort offensé de l'entreprise que nous auions faicte sur son autorité, luy majeur, & outre en la ville capitale d'auoir voulu assembler les Princes, Pairs, & Officiers de la Couronne, chose qui est sans exemple, sans raison, ny apparence, & qu'aucun Parlement auparauant n'auoit iamais fait : Qu'il scauoir bien que la cognoissance & le pouuoir du Parlement estoient limitez, & comme il ne cognoissoit des comptes ny du fait des gabelles, aussi le Roy auoit tousiours reserué à soy la cognoissance des affaires de son Estat ; Que le Parlement se deuoit resouuenir de la responce faicte au Duc d'Orleans, du temps du Roy Charles huietième par feu monsieur le President de la Vaquerie, dont les seruices & la memoire ont esté loüez & estimez des Roys ; & des offences & ressentimens que le Roy Loys douzième, & le grand Roy François tesmoignerēt en vne beaucoup moindre entreprise, & de la rigueur de l'Arrest qui interuint du regne de Charles 9. pour auoir voulu en vne affaire de moindre importance contester à son autorité, dont la deliberation de la Cour fut biffée, & l'execution publiée à huis ouuerts : Que ce Parlement le premier du Royaume, deuoit employer son autorité, qu'elle tient des Roys, à faire valoir celle du Roy, au lieu de l'employer à la déprimer, luy majeur & en sa preséce, dequoy encores qu'il se sente fort offensé, neantmoins ayant sceu que l'arresté auoit passé par la pluralité des voix des plus ieunes & derniers receus, & que les anciens auoient esté d'aduis contraire, a receu d'eux contentement, les prioit

de continuer & s'asseurer qu'il s'en souuiendra : Et afin leur dit-il que vous ne preniez subiect d'excuser vostre arresté pour auoir remis l'execution à la volonté du Roy, il est bien aduertý de l'arresté du premier iour qu'il en fut libéré & de ce qui a esté corrigé & mis de nouveau pour adoucir son indignation, de laquelle neantmoins, il ne restoit pas d'estre offensé : pourquoy il vous fait defences de l'executer, d'assembler aucuns Princes ny Pairs, ny en deliberer d'auantage. Que le Roy auoit repris la parole, & dict, Messieurs ; ce que Monsieur le Chancelier vous a dit, c'est moy qui le vous dy : ie vous enuoyeray demain ma response par escrit ; ce pendant ie vous fay defences de passer outre. A quoy Monsieur le premier President dit ; Sire, nous auons beaucoup de desplaisir qu'apres auoir, depuis l'heureux aduenement à vostre Couronne, si fídellement seruy vostre Maisté, le feu Roy Henry le grand, & les Roys nos souuerains Seigneurs, depuis l'establissement de vostre Cour, de veoir que nos seruices recogneus par tout le monde, soient si mal interpretez que l'on les prenne pour entreprises de vostre autorité, & que vous en soyex offensé contre nous. Nous nous assurons que s'il nous estoit permis de repliquer apres un courroux tesmoigné de vostre bouche, à nous fait entendre par Monsieur le Chancelier, nous pourrions avec tout honneur & respect, au contentement de vostre Maisté, soulagement des esprits de ious ceux qui vous assistent, luy représenter, que vostre Parlement n'a iamais rien deliberé que les Roys n'ayent approuué, & dont au lieu d'en auoir des ressentimens & d'en faire de mauuais iugemens, nous n'ayons de tout temps receu des louanges & bienueillances, mesmes durant les regnes alleguez par Monsieur le Chancelier. Mais parce que nous sommes appelez deuant vous par vostre commandement sans auoir charge du Parlement : Nous ne manquerons de luy faire entendre ce qu'il vous à pleu nous prononcer de vostre bouche & de celle de Monsieur le Chancelier : Cependant nous vous supplions tres humblement prendre de bonne part l'arresté, comme fait, non par

L'aduis des derniers de la compagnie, mais par la voix & opinion commune, seule, & innocente de toute vostre Cour de Parlement, à laquelle, apres l'arresté, & ieunes & vieux, & tous ensemble ont également contribué, & le prendre plusloft pour un excès & abondance d'une bonne, sincere & droicte intention à vostre service que pour entreprise sur vostre auctorité. Lors la Royne dist, Messieurs, ie sçay bien que ce sont les ieunes qui ont proposé cet aduis & qui l'ont fait passer à la pluralité; ie n'en sçay point mauvais gré à la Cour, & remercie les anciens & tous ceux qui s'y sont opposés; ie m'employeray pres du Roy mon fils pour les recognostre, & resmoigner leur bonne volonté. Monsieur le premier President respondit; Madame, nous vous supplions tres-humblement croire que nous auons tous participé à l'arresté, oublier le rapport contraire, & nous honorer également de vostre bonne volonté envers le Roy. Ce raport acheué les gens du Roy prièrent la compagnie d'auiser à faire quelque Remonstrance pour leuer au Roy ce mescontentement. Eux retirez fut mis en deliberation qu'il estoit de faire pour contéter le Roy, & sans se departir neantmoins de la premiere deliberation de luy faire des Remonstrances, en laquelle fut remarqué fort à propos l'artifice de ceux qui occupans à toutes heures les oreilles du Roy & de la Royne, leur auoient fait croire que la responce que la Cour attendoit & demandoit du Roy, estoit sur cet arresté qui auoit causé cette indignation qu'ils vouloient entretenir, & la perfidie de ceux qui si promptement & trop legerement auoient donné l'aduis de ce que Messieurs des Enquestes auoient ingenuement proposé à Monsieur le premier President: Car la verité, qui ne peut estre contredicte, est, que la responce qu'ils entendoient supplier le Roy de faire estoit qu'il luy pleust oüyr son Parlement, & l'entendre suivant la promesse qu'il luy auoit faicte, sur les Remonstrances qu'il auoit à luy faire, & selon la proposi-

tion faicte dés le vingt-septiesme Mars dernier. Et la conclusion de la deliberation ne le resmoigne pas seulement, mais en faict la preuue tres-clair, n'y ayant esté arresté autre chose par l'aduiscommunde toute la compagnie, sinon que de chacune chābre on deputeroit deux Conseillers, tant des Enquestes que des Requestes, avec aucuns de la grande chambre, pour tous ensemble, avec Messieurs les Presidents, dresser de tres-humbles Remonstrances qui luy seroient faictes & presentees par escrit.

Le Samedy vniesme d'Auril, le Roy enuoya au Palais vn valet de garderobbe, & Huissier du Cabiner de la Royne, nommé Sauueterre: vers Messieurs les Presidents, leur commander de le venir trouver au Louure sur les quatre heures, & d'amener quatre des anciens de la grande chambre, & Messieurs les Presidents des Enquestes, avec vn Conseiller de chacune chambre. Messieurs des Requestes n'en peurent estre aduertis d'autant qu'ils n'estoient au Palais. A quoy ils obeïrent & furent tous trouver le Roy.

Le vingt-neufiesme du mesme mois, Monsieur le premier President fit appeller par toutes les chambres afin de faire le rapport de ce que le Roy leur auoit dit, n'ayant peu estre fait plustost a cause des festes de Pasques; Et dit que le Roy auoit mandé Messieurs les Presidents, & aucuns de ceux des Enquestes & Conseillers, qu'estans arriuez au Louure, & conduicts au Cabinet, où estoïent le Roy, la Royne sa mere, le Sieur de Souueray, M. le Chanc. absent, le Roy leur dit qu'il les auoit mādéz sur ce qu'il auoit entēdu que nonobstāt ses defēces faictes, deux iours auparauāt, de faire des Remōstrāces cōcernās les affaires de son Estat ils n'auoiēt laissé de deputer de chacune chābre pour en faire. Sur quoy la Royne sa mere leur fe-

roit

roit entendre sa volôté, laquelle prit la parble & reïterât celle du Roy, dist que c'estoit chose qui n'auoit iamais esté faicte, & le deffendoit, que si le Parlement entreprenoit, ils s'en ressentiroit : *Il est (direlle) vostre Roy & vostre Maistre qui vsera de son auctorité si l'on contreuient à ses deffences.* Adiousta que c'estoit vnè faction de gens mal affectionnez au Roy & à son seruice, & avec cholere prononça ces mots, *Qu'elle s'en vengeroit.* A quoy, Monsieur le premier President fit responce qu'il en aduertiroit la Cour de Parlement. Le rapport ouy, & mis en deliberation ce qui estoit besoin de faire, il fut arresté vnanimement, que suiuant la precedente deliberation Messieurs des chambres apporteroiēt leurs memoires à fin d'estre veus par Messieurs les Presidents & aucuns des Conseillers de la grande Chambre, pour dreller les Remonstrances, que la Cour a ordonné estre faictes.

Le Ieudy quatorzième iour de May, deux de Messieurs les Cōseillers des Enquestes furēt deputez, & vindrent en la grande chambre sur les neuf heures, pour aduertir Messieurs les Presidents & Conseillers d'icelle; que suiuant la resolution & arrest de la Cour, Messieurs des Enquestes s'estoient assemblez, & que sur les memoires qui auoient esté recueillis de chacune chambre, ils auoient drellé des Remonstrances, & fait vn Cahier general de toutes les memoires particuliers : que s'il leur plaïoit de deputer quelques vns de Messieurs de la grande Chambre pour les voir, ils estoient prests de les leur communiquer. Monsieur le premier President leur fit responce, que c'estoit chose qu'il faillloit faire selon l'intention de la compagnie : Et fut arresté à l'heure mesme que l'on y vaqueroit le Samedy ensuyuant, sixiesme du mois de releuée, & que tous Messieurs les Presidents s'y trouueroient, six, les plus anciens de la grande chambre,

quatre laïcs, & deux d'Eglise.

Et le sixiesme iour dudit mois l'apresdisnee, Messieurs les sept Presidens, les six plus anciens de la grande chaire, & douze de Messieurs les Presidens, & Conseillers des Enquestes, & Requestes, députez, se trouuerent en la Chambre de la Tournelle, où estans tous assemblez, les Remonstrances furent leues par celuy de Messieurs qui auoit pris la peine de les dresser. Et apres auoir esté bien ouyes & entendues furent fort loüees & approuuees, par vn general consentement de toute la compagnie. Et aucuns de Messieurs les Presidens dirent qu'il n'y auoit rien en tout cela qui ne fust bon, mesme pour ne laisser aucun degoust ou subject de plainte, l'on reforma quelques paroles, comme au lieu qu'il y auoit: *de supplier le Roy de faire informer des choses comprises en vn article*, on trouua bon de temperer ce mot, & y mettre au lieu *d'informer, d'y pourueoir*: & de ne particulariser point le Nonce du Pape, autrement que sous le nom general d'Ambassadeurs de Princes estrangers, avec lesquels les subiects du Roy ne doiuent auoir aucune habitude ny communication: combien que chacun fust bien d'accord, que le Nonce l'a trop grande & trop familiere, avec non seulement les Ecclesiastiques, mais avec quelques Officiers. Aussi fust aduisé d'y adiouter vn article, pour supplier le Roy de pourueoir aux Archeueschez & Eueschez, gens d'aage, de litterature, & de bonne vie: Et en vn autre endroit fut osté le nom du Pape.

Le Mercredy vingt-iesme, Messieurs des enquestes desirerent que ces Remonstrances furent leües, toutes les chambres assemblees, preuoyants, & prudemment, que plusieurs pourroient dire ne sçauoir que c'estoit, ny si elles estoient bonnes, n'en ayants ouy parler, seulement qu'il y pourroit auoir quelque chose à reformer, & qu'il

failloit que chacun en dist son aduis: comme de fait, quelques vns semoient des-ja le bruit par le Palais, & dehors, qu'il failloit que toute la compagnie assemblee les vist, & qu'il n'estoit raisonnable qu'elles fussent veües & iugees par des deputez seulement: De façon que pour contenter les plus curieux, & euitier les plaintes ou rumeurs que la diuersité des humeurs & des opinions peuuent apporter, ils obtindrent aussi tost de Monsieur le premier President d'assembler les chambres, & incontinent qu'elles furent assemblees, vn de Messieurs de la grande chambre fut prié d'en faire la lecture, ce qu'il fist fort distinctement, & intelligiblement: lesquelles bien attentiuement ouies, & avec silence, comme nocturne, furent derechef grandement loüees, & approuuees par vn nouueau & plus vniuersel consentement. Ce fait, Monsieur le premier President, par l'aduis de toute la compagnie, enuoya au Parquet appeller les gens du Roy, auxquels il fit entendre que les Remonstrances que la Cour desiroit faire au Roy, estoient dressées, & prestes à luy presenter: que la Cour les chargeoit d'aller vers Monsieur le Chancelier, pour demander audience au Roy, afin de les luy faire entendre par escrit, comme il auoit esté arresté. Les gens du Roy rapporterent que le Roy donneroit audience à la Cour le Vendredy prochain, vingt-deuxiesme du mois. A ce iour Messieurs du Parlement aduertis, ayants à la façon accoustumee, député de chacune chambre des Enquestes, vn de Messieurs les Presidents, & trois Conseillers, & autant des Requestes, Messieurs les Presidents de la Cour se trouuerent six seulement, l'vn d'eux s'en estant excusé, en la grande chambre, ou toute la compagnie s'assembla sur les deux heures de releuee: Et enuiron les trois heures monterent tous en carroces, & les gens du Roy avec

eux, au nombre d'environ quarante, & plus, suivis de grande multitude de personnes, comme en telles occurrences il se veoit ordinairement, toutes les aduenues du Louure bordees de peuple en haye, la court toute pleine de monde, les montées & les fenestres occupees: tant le brouët de ceste grande & importante action auoit fait naistre de desir a vn chacun d'en veoir l'execution.

Le Samedy vingt-troisiesme iour dudit mois, Monsieur le premier President fist appeller par toutes les chambres, pour faire le rapport de ce qui auoit esté faict le iour precedent: Les chambres assemblees, les gens du Roy presents, il rapporta que le iour d'hier executans la deliberation de la compagnie, Messieurs les Presidents & Conseillers, deputez avec luy, s'estoient acheminez au Louure, suyuant le commandement du Roy: où estans arrivez, veirent vne grande multitude de peuple, & furent conduicts en vne sale basse, que l'on leur dist estre vn lieu où l'on faict reposer les Ambassadeurs auparauant qu'ils se presentent au Roy pour auoir audience. Qu'apres auoir attendu environ demie heure ou plus, le Sieur de Vitry Capitaine des gardes du corps du Roy, les vint trouuer pour les conduire en la chambre du conseil, où estoient le Roy & la Royne, & les fist monter par vne petite montée secrette, disant qu'il y auoit tant de presse, & si grande foule par les autres montées, que malaisement & sans grande incommodité, pouuoient-ils y passer: Qu'il les conduict en la chambre, où estoient le Roy & la Royne, assistez de Messieurs de Guyse, de Neuers, de Vendosme, d'Espernon, de Souray, & plusieurs autres Seigneurs & officiers de la Couronne, Monsieur le Chancelier, le Marechal d'Ancre, & autres du Conseil d'Estat: Qu'apres auoir salué le Roy, il luy dist qu'il estoit chargé de luy presenter de tres-humbles Re-

monstrances de la part de sa Cour de Parlement, non pas luy représenter le motif de l'Arrest donné le vingthuitiesme Mars; qu'elle le supplioit tres-humblement de croire qu'autre volonté ny intention ne l'a poussée à les faire, que la necessité de l'Estat de son Royaume, & vne grande, bonne & sincere affectiō, qu'elle a tousiours porté & porte à son seruice, au bien & repos de son Estat: en quoy ceste cōpagnie ne cede à autre, qui soit, non pas en France seulement, mais en tout le monde, & dont elle a tousiours rendu si bons & fidels tesmoignages, que l'on ne peut en desirer de plus grands; qu'elle ne porte enuie aux grandes richesses, faueurs & dignitez d'aucune personne, ny malalent à aucun; qu'elle n'a iamais marqué à la fidelité deuë au seruice du Roy, & a tousiours reconnu ceste Maïesté pour son souuerain Seigneur, & vnique maistre, le suppliant de les receuoir, & auoir agreables, comme venans de la plus deuotieuse, fidele & obeïssante compagnie qui puisse estre: ce qu'ayant dict, il presenta le Cayer des Remonstrances au Roy, qui les prit, & les bailla au Sieur de Lomenie, Secretaire d'Estat; & apres commanda que l'on se retirast: Qu'il diét lors au Roy, qu'il auoit charge de supplier tres-humblement sa Majesté, qu'elles fussent leuë presentement; ce que la Royne trouua bon; Et lors le Roy commanda au fils du Sieur de Lomenie, de les lire, ce qu'il fit, & les leur d'vne voix fort intelligible; & si bien, & distinctement, qu'elles furent attentiuelement escoutées, & fort bien entendues de tous ceux qui estoient dans la chambre.

Qu'apres auoir esté toutes leuës, le Roy leur commanda de se retirer au grand Cabinet, & que demie heure apres ou enuiron, ou les manda de retourner, où estans, le Roy leur dit qu'il auoit entendu les Remonstrances,

desquelles il n'estoit pas bien satisfait : que la Royne sa mere diroit le surplus. La Royne alors prit la parole, & dict, que le Roy auoit grande occasion d'estre offencé de la compagnie, laquelle, contre ses deffences auoit touché aux affaires de son Estat : que le Parlement vouloit se mesler de reformer, & de disposer du gouuernement & des finances, qu'elle n'estoit point si peu clair-voyante, qu'elle ne recogneust bien que l'on attaquoit sa Regence, que tous les Ordres de ce Royaume, assemblez en corps d'Estat, & le Parlement mesme auoient louée : que l'on ne pouuoit parler du gouuernement, & administration des affaires du Royaume, sans la toucher & parler d'elle : qu'elle estoit bien aduertie que ces Remonstrances n'auoient pas esté trouuées bonnes, ny approuuées par tous ceux du Parlement, & qu'il y auoit six Presidens, tant presens que absents, qui y auoient résisté, mais que six ou sept, ou Presidens, ou Conseillers, en auoient esté les promoteurs, desquels le Roy scauoit les noms & demeures : qu'à l'aduenir il ne l'endureroit plus, & les scauroit bien chastier : Qu'elle vouloit que chacun sceust, & pouuoit le dire tout haut, qu'il ny eust iamais Regence en France plus heureuse que la sienne, & s'arrestant là, dist que la cholere la pressoit en telle sorte, qu'elle ne pouuoit plus parler ; commanda à Monsieur le Chancelier de continuer, & faire la responce du Roy, Que Monsieur le Chancelier dist que la France estoit vne Monarchie, ou le Roy seul commandoit, tenant son Royaume souverainement de Dieu : Qu'il y auoit des loix & des Ordonnances, par lesquelles il deuoit le gouverner, dont il n'estoit tenu de rendre comte à personne : qu'il n'appartient point au Parlement de controller son gouuernement que le Roy auoit distribué les charges, & fonctions en son Royaume distinctement, à la chambre des

comptes, la ligne de compte, aux Generaux de la Iustice. I saydes: dont il ne iugeoit point: à plus forte raison ne pouuoit il se mesler de la conduicte, & direction de son Estat, que le Parlement ne pouuoit, ny ne deuoit entreprendre plus que le Roy luy permettoit; qu'il est vray, que les Roys aux grandes affaires auoient accoustumé de prendre aduis du Parlement, & croyoit qu'il pouuoient grandement seruir, mais que c'estoit quand il luy plaisoit: que quand leur auctorité estoit ioincte avec la volonté du Roy elle estoit tres bonne, & conseileroit tousiours le Roy d'vser de leurs Conseils, non pas les donner de leur mouuement & sans la volonté du Roy: que quand ils voudront eux mesmes y penser, ils trouueront qu'ils ne le deuoient faire: que le Parlement s'estoit porté insensiblement à vne deliberation, qui alteroit grandement l'auctorité du Roy: que le temps mesme y estoit fort contraire, auque l'on traueille aux cayers des Estats, lesquels estant enuoyez au Parlement, il eust lors trouué subiect de faire ce qu'il faict maintenant hors de saison: que veritablement l'intention estoit bonne, mais qu'au parler il y auoit du manquement: qu'il auoit dit cy deuant que cela estoit sans raison, qu'il dit maintenant que cela estoit sans exemple ayant charge expresse de dire l'un & l'autre, d'autant qu'il ne se trouuera point que le Roy estant à Paris, le Parlement de son propre mouuement ait assemblé les Princes, Ducs, & Officiers de la Couronne, dont il ne veut autre preuue que les exemples rapportées dans les Remonstrances: que pource qui se passa du regne de Charles cinquiesme, ce fut le Roy mesme qui sur vne Requeste présentée par ses anciens seruiteurs qui estoient en Guyëne, fit appeller le Roy d'Angleterre en son Parlement, faisant condamner les rebelles & confirmer les fidels: que toutes ces allegations ne

se pouuoient aporoprier au subiect present : Et quand aux traictez de paix , ne se deliberoient point au Parlement : que l'accord estant, on faisoit publier la paix à son de trompe, qu'au dernier traicté faict avec le Roy d'Espagne, auquel il eut l'honneur d'estre employé, apresque les deputez furent d'accord des articles, & qu'ils furent signez du Roy, la paix fut publiée à son de trompe, & l'on temps apres sa Maiesté enuoya au Parlement, pour estre enregistrez : que pour les euocations, dont on se plaignoit, qu'il n'en auoit point donné sans deliberation de Conseil, & que c'estoit pour empescher que les Parlements au preiudice des ordonnances, prissent cognoissance des differents de ceux, qui auoient des parens en leur compagnie : quand aux abolitions, il pouoit asseurer pour l'aduenir, qu'il ne s'en passera plus aucunes, le Conseil estant reiglé de sorte qu'il seroit malaisé de le faire : Qu'il pouoit dire pour le passé n'en auoir scellé, sans auoir esté deliberées, & rapportées en plein Conseil, par l'un des Maistres des Requestes, n'en ayant iamais esté vsé si sobrement que depuis quatre ou cinq ans : Et pour les cassations des Arrests du Parlement, ç'a esté quand il a entrepris de iuger par dessus les defences du Conseil, qui n'a esté tenu tels iugements pour Arrest que leurs Arrests n'auoient iamais esté plus soigneusement gardez qu'ils l'auoient esté depuis peu d'années : Que l'on auoit faict cesser le Conseil pour trauailler sans intermission aux cahiers des Estats : & qu'estants à present sur celuy de la iustice, sa Maiesté auoit commandé d'en prendre leur aduis : Que le Parlement ne gardoit pas les ordonnances, sur la reception des Conseillers, receuant plusieurs freres & proches parents, dans mesme Parlement, moins celle de Molins confirmée à Blois pour les procez de Commissaires, qui ne les permet qu'en

permet qu'en cinq cas, que l'on ne garde pas, qu'il y a
 voit des Requestes au Conseil pour en casser des Arrests:
 ce que l'on n'a encores fait: Que d'ailleurs on euoque
 des procez des Iuges subalternes, même les decrets, &
 les iuge l'on en premiere instance: Que l'on casse les Ar-
 rests du Conseil du Roy, encores qu'ils portent ces
 mots: *Le Roy en son Conseil*, & deschargent les parties des
 assignations qui leur y sont donnees: Qu'on ne pouuoit,
 ny deuoit on se plaindre de la Regence de la Roynne qui
 a esté si heureuse que iamais les historiens n'en ont re-
 marqué de si favorable, pendant laquelle la France a iouy
 abondamment de toutes sortes de biens: Que la Roynne
 ne doit compte qu'à Dieu seul de sa Regence, & quand
 elle voudra se rendre au Roy, sa Majesté luy en scaura
 gré; Que personne ne pouuoit prescrire au Roy quel
 Conseil il doit prendre, qu'il auoit trouué bon se seruir
 des mesmes personnes que le feu Roy auoit choisi, dont
 il s'estoit bien trouué: Que sa Majesté feroit veoir en
 son Conseil les Remonstrances, & y feroit respondre
 Que comme ils pensoient se retirer, Monsieur le Presi-
 dent Ianin commença à dire, qu'ayant innocemment
 manié les finances du Roy: avec ceux qui y sont em-
 ployez, il penseroit encourir blasme, s'il ne disoit
 quelque chose de sa charge, de laquelle il respon-
 droit pardeuant les plus seueres Iuges, & qu'il s'eston-
 noit comme il estoit blasmé, non par vne populace,
 qui interprete legerement les actions d'autrui, mais
 par vne compagnie de gens sages, malicieusement
 informee de l'administration des finances du Roy, que
 c'estoit à luy que l'on s'adrescoit, & non à la Roynne,
 qui n'estoit tenue de rendre compte de sa Regence
 qu'au Roy, lequel quand il sera en aage de l'ouyr,
 s'il veut en prendre la peine, luy rendra mille graces

du soin qu'elle y a aporté Et pour entrer au particulier, qu'apres que le Roy nous fut rany, Monsieur de Seully continua le maniemment des finances, iusques à la guerre de Iulliers, en arresta luy mesme la despence, ne laissant lors de deniers comptans es mains du Thresorier Puger, que trois millions cinq cents mil liures, qui furent baillez au sieur de Beaumarchaiz. De dire que le reuenu du Roy soit augmenté depuis le deceds du feu Roy, on ne sçauroit le dire, puis qu'au contraire il y a eu du rabais sur les gabelles de deux millions de liures, & les charges augmentees de quatre millions, pour la necessité des affaires. Quant au deniers de la Bastille, quelques necessitez que l'Estat aye pary, on n'y a point touché, sinon pour arrester le cours des mouuemens derniers, & pour le voyage de Poictiers: Et sur ce qu'on a dict, qu'on mettoit du temps du feu Roy, tous les ans deux millions de liures, que cela n'estoit point, que l'on n'y mettoit que huiet cens mil liures: qu'il estoit fort perilleux de toucher au mal, sans y apporter le remede: qu'il faillloit nōmer, & particulariser ceux qui en estoient cause, lesquels seroient incontinent abandonnez des gens de biē, & que luy mesmes seroit le premier à le faire: qu'à la verité, il seroit expedient de retrancher les depenses, & charges suruenues, que son deuoir l'obligeoit de dire cela. Que monsieur de Guise, ce propos finy, parla au Roy, & luy offrit sa vie, son espee enuers tous, & contre tous: & que les Sieurs de Vendosme, & de Montmorency en firent autant. Que monsieur d'Espernon dist, que le Parlement n'auoit point de puissance d'appeller les Pairs, & les assembler sans permission du Roy; qu'il auoit l'honneur d'y seoir, m

qu'il se garderoit bien d'y aller pour l'instruire d'affaires d'Estat. Qu'il luy repliqua que l'Arrest estoit sous le bon plaisir du Roy. Que ledit sieur d'Espernon respondit, que l'Arrest n'estoit ainsi du commencement, & qu'on scauoit tout. A quoy voulant respondre, & aux autres qui auoient parlé, la Royne luy ferma la bouche, & luy dict: *C'est assez.* Que ce discours finy, le mareschal d'Ancre se leua de dessus vn Tabouret, sur lequel il estoit assis, s'approcha de l'oreille de la Royne, & luy parla bas, puis retourna en sa place: laquelle s'adressant au Parlement, dict, qu'il souffroit faire & vendre des libelles diffamatoires, contre l'honneur du Roy, & le sien, & n'en faisoit iustice: *Tenez*, dit-elle, *Voyez ce liure intitule la Cassandre*: & le bailla à monsieur de Pisieux Secretaire d'Estat, qui en leut quelques fueillerts marquez, puis se teut: à quoy il luy respondit qu'il y auoit trois iours qu'il en faisoit faire vne exacte perquisition chez les Imprimeurs, & qu'il n'auoit encore sceu rien descouvrir. Que monsieur d'Espernon dist que ce n'estoient ces pauvres gens là qu'il failloit punir, qui ne cherchent qu'à gagner leur vie, mais les auteurs: que la Royne fit appeler les gens du Roy, & leur fit bailler le liure.

Par ce rapport plusieurs obseruerent avec apparence, que l'on auoit préparé le Roy & la Royne à quelque indignation & cholere, comme il parut puis apres: par-ce que quand le Parlement alloit au Louure, il montoit par les grands degrez, à la veüe d'un chacun, droict en haut: Et si l'on le faisoit attendre, c'estoit ou en la Chambre du Roy, ou en vn cabinet. Icy il fut receu en vne salle basse, comme vne sale de commun, & apres auoir attendu long temps, conduict par vn petit escalier estroit, & secret, afin de n'estre veu de personne, pour obscurcir le lustre d'une action fort attendue & importante, & raualer a u-

cunément la dignité de ceste compagnie, qui a esté fauorablement & honorablement traittee des Roys, l'ayant recogneuë vtile, & necessaire à leur Estat, pour la conseruation de la Majesté & autorité Royale: & l'honneur qu'elle a iustement acquis de sa fidelité, & obeysance incomparables.

Le Lundy premier iour de Iuin ensuiuant, les gens du Roy vindrent enuiron les sept heures & demie du matin à la grande chambre, messieurs les Presidents & Conseillers, prests à monster à l'audience, dire monsieur Seruin portant la parole; Que le mercredy xxvii. du moys de may, leur fut mandé par le Roy de se trouuer au Louure; A quoy ils obeyrent, pour entendre la volonté du Roy, lequel les ayant fait entrer au cabinet, leur dit que la Royne leur diroit sa volonté, laquelle assistee de monsieur le Chancelier & quelques autres leur dist, que le Roy les auoit mandez pour leur faire lecture de l'Arrest qu'il auoit donné en son Conseil sur les remonstrances à luy faictes par la Cour de Parlement; qu'il vouloit qu'ils l'entendissent: qu'ils remonstrent qu'il n'estoit point besoin de leur faire sçauoir à eux particulièrement, qu'il vouloit qu'il vint à la cognoissance du Parlement: qu'ils supplioient tres humblement le Roy de ne les point engager en ceste lecture, eux qui estoient au Parlement pour l'y seruir, & qu'il ne leur commandast pas chose qui allast contre le Parlement, du corps duquel ils estoient: La Royne leur repliqua qu'ils deuoient obeyr au Roy, estoient ses gens, & ne pouuoient ny deuoient refuser ce commandement. On auoit aussi mandé le Greffier du Tillet, auquel la Royne dit, qu'il estoit Officier du Roy au Parlement, que le Roy desiroit auoir l'Arrest sans dire quel: il fit response qu'il ne sçauoit pas quel arrest la Royne luy demandoit & n'auoit

souuenance d'en auoir aucun : Et sur ce que l'on doutoit
 quel Arrest elle entendoit, le sieur de Souuray dist, l'Ar-
 rest des Remonstrances: qu'ils cogneurent que c'estoit
 celuy du vingt huietieme de mars qu'elle entendoit,
 dont y auoit eu tant de plainte: que les choses en de-
 meurèrent là pour ce iour: mais le lendemain xxviii.
 iour de l'Ascension, l'on porta à monsieur le Procureur
 general vn Arrest en parchemin, seellé, avec vne com-
 mission adressante au Parlement, donné au Conseil du
 Roy, avec commandement de la presenter, & le faire
 lire au Parlement: ce qu'ils auoient différé de faire le
 lendemain, voulant tant qu'ils pourroient, gagner
 temps, & s'ils pouuoient, retarder au moins, s'ils ne
 pouuoient l'empescher, l'exécution de ce commande-
 ment. Dirent que le Vendredy vingt-neufiesme, ils fu-
 rent encores mandez au Louure, & leur demanda l'on
 qu'elle diligence ils auoient faict d'excuter le com-
 mandement du Roy, & pourquoy ils ne l'auroient
 pas faict, qu'il respondit, qu'ils supplioient tres-
 humblement le Roy, & la Royne, de les excuser
 de porter à son Parlement ce qu'ils sçauoient bien pou-
 uoir & deuoir estre porté par autres personnes qu'eux:
 qu'ils estoient ses gens, & qu'ils n'auoient iamais man-
 qué à obeir fidelement aux commandemens de luy & de
 la Royne: qu'en les chargeant de ce commandement
 vers le Parlement, il sembloit quel'on prenoit occasion
 de les diuiser d'avec luy, & leur oster tout moyen de
 leur rendre tres-humble seruice en ceste compagnie,
 dont ils estoient, pleine d'obeyssance & de fidelité. La
 Royne leur dit, que le Royle vouloit, & elle desiroit
 conseruer son auctorité d'elle, & que les comman-
 demens du Roy, & les siens, fussent executez
 sans excuses & sans delay: que le Procureur general

du Roy lors prit la parole, & dit à la Royneces mots; *Madame vous faictes porter vn flambeau, qui allumera vn feu, dont les cendres dureront long temps, & nous en craignons l'euenement.* Qu'elle luy repliqua: *Che euenement, que le peuple se mouuerai.* Non, Madame (dit-il,) mais vn changement de la bonne affection & esloignement de la deuotion des bons subiects & seruiteurs du Roy, & la desunion des grandes compagnies de ce Royaume qui exercent la iustice, qui faict regner les Rois. Qu'il y eut longue cōtestation sur ce refus qu'ils faisoient de se charger de cet Arrest, mesmes qu'il se mit à genoux deuant le Roy pour le supplier de ne les forcer point à ce faire, d'auoir égard à ce qu'ils estoient, & que la qualité qu'ils tenoient en la Cour de Parlement les en pouuoit excuser. Mais le Roy ditoit tousiours, *Non, non ie le veux, & la Roynne aussi.* Que depuis le Samedy & le Dimanche, ils ont esté tellement sollicitéz & pressez, que s'estas mesmes absentez de leurs maisons, on estoit venu les trouuer aux Eglises, & en fin de nuit coucher en leurs lits, avec paroles aigres, & comme de menaces; qui estans tellement contraincts & forcez, ils apportoiēt la volonté du Roy par son tres-expres commandement, & trop de fois reïteré, duquel il n'a pas esté en leur pouuoir de se defendre ny s'excuser. Et ce faict mirent deux parchemins sur le bureau, & se reïterent, lesquels Monsieur le premier President fit prendre par Voisin clerc du Greffe, & fit appeller Messieurs de la grande chambre, de la Tournelle, & de l'Edit, & en ceste assemblée leur fit entendre tout ce que les gens du Roy auoient dict, lesquels en auoiēt faict entendre autant à tous Messieurs les Presidents dès le Samedy: Et mesmes y auoient faict appeller quatre ou cinq de Messieurs les Presidents des Enquestes, & dict qu'il les auoit prié de le faire entendre en leurs chambres, & les disposer à faire ce que les gens du Roy croioient par leur aduis pouuoir composer cēt affaire avec la bonne

grace du Roy & l'honneur du Parlement, qui estoit, que
 si la Cour deutoit quelques vns vers le Roy & la Roine,
 leur faire entendre que par les Remonstrances, le Parle-
 ment n'a iamais entendu ny pensé de parler des actions
 du Roy ny de la Roine, ny de sa Regence & gouverne-
 ment, reiterer les grandes submissions que desia l'on a-
 uoit faites, leur protester & asseurer, comme de coustu-
 me, tout seruice, obeissance, fidelité, & respect: ils auoient
 ferme opinion que l'on appaiseroit le couroux & l'indi-
 gnation du Roy & de la Roine. Monsieur le premier Pre-
 sident ayant proposé cela, tous Messieurs de la grande
 chambre, trois ou quatre exceptez, furēt d'avis qu'il fail-
 loit que toutes les chambres des Enquestes & Reque-
 stes, en fussent aduerties, & qu'ils entendissent tout ce
 que dessus; que la grande chambre seule n'y pouuoit re-
 soudre rien sans eux, ny y toucher seulement. A lors les
 clerks du Greffe furēt enuoyez aux chambres, lesquelles
 incontinent assemblées, Monsieur le premier President
 fit sommairement le rapport de ce que les gens du Roy
 auoient dict & leur auoient communiqué. L'affaire mis
 en deliberatiō en la maniere accoustumée, il n'y eut qu'un
 aduis, par lequel fut resolu que l'on contenteroit le Roy
 par toutes submissions & satisfactions, & la Roine aussi,
 & fut arresté, que Messieurs les premiers Presidents &
 autres, avec quelque nombre de Messieurs les Conseil-
 liers, tant de la grande chambre, que des Enquestes, se-
 roient deputez pour aller vers le Roy, & luy tesmoigner,
 & à la Roine sa mere, le desplaisir que la Cour receuoit
 de leur mal-contentement; les asseurer qu'elle n'a touché
 ny entendu toucher à leurs actiōs, moins aux personnes,
 & n'auoir esté poussée à faire les Remonstrances, que
 pour le bien & seruice du Roy, & de son Estat; leur reite-
 rer avec toute humilité & submission, la supplication
 qu'elle leur a faite, auior ses Remonstrances agreables,

qu'elle croit estre veritables; & y pouruoir ainsi que ses predecesseurs ont cy deuant faict.

Le Mercredi troisieme de ce mesme mois, peu auant huiet heures, les gens du Roy vindrent en la grande chambre, pour rapporter à la compagnie qu'ils auoient esté voir Monsieur le Chancelier, pour le prier de scauoir la commodité de la Roynes, & quel iour & heure il luy plairoit donner à Messieurs les Présidens, & Conseillers; Deputez pour faire au Roy, & à elle, les submissions, & declarations ordonnées luy estre faictes par la deliberation precedente, lequel leur qu'il dist scautoit de la Roynes le iour, & sō heure, & les en aduertuoit, que sur les trois ou quatre heures, ils furent mandez au Louure, où ils trouuerent toutes choses changées, & que la Roynes leur dist, que le Roy ne vouloit rien oüyr, ny entendre, que sa volonté ne fut executee, l'Arrest donné en son Conseil, leu & enregistre; Surquoy Monsieur Seruin remonstra que le Parlement s'estoit porté à tout le deuoir que le Roy & la Roynes pouuoient desirer, & de leur rapporter tout contentement & satisfaction que l'on doit, & peut-on faire à son Roy, mesmes des trois points qu'ils auoient desiré. Le premier, qu'il n'a iamais pensé seulement toucher, ny parler du Roy, ny de sa personne, & actions. Le second, non plus de celle de la Roynes, ny de la Regence & gouuernement; au contraire, louer grandement sa prudence & sagesse, son soin & affection au bien de l'Estat, & repos du Royaume, mesmes depuis la majorité du Roy. Le 3. qu'il n'a point entrepris sur son authorité, par l'Arrest dont on se plaint, & n'a pas creu, ny croyra iamais, qu'il aye, ny puisse auoir autre autorité que celle que les Roys ont mis entre ses mains, ny qu'il aye, ny doye auoir puissance souveraine en ce Royaume, que celle du Roy; que le Parlement n'ayant aucune autorité sans lui, ne peut pas entreprendre

rien de foy, ny subsister sans la sienne; qu'il n'a que l'obeyssance & la fidele affection à son seruice, & vn vœu commun, incomparable à la conseruation d'icelle; que nonobstant leur remonstrance & supplication, la Royne leur dist que le Roy vouloit & leur commandoit de faire que son commandement fust executé, que l'Arrest fust leu & enregistré: adjoustant qu'ils le fissent entendre, & sur peine de desobeyssance; qu'ils estoient fort marris d'estre contrains d'apporter commandement, dont ils ont essayé par toutes honnestes façons & supplications, de se descharger. Sur ce il fut deliberé, & passa par aduis, d'assembler les Chambres, qui incontinent furent mandées en la maniere accoustumée; lesquelles assemblées, monsieur le premier President commanda à Voisin, principal Clerc du Greffe, de lire cet Arrest du Conseil Priué. Cet arrest ayant esté leu, fut mis en deliberation ce que le Parlement auoit affaire sur cela. Les opinions alloiēt routes au commencement à Remonstrances & grandes plaintes des mauuaises, rigoureuses, & injurieuses paroles y contenuës, comme calomnie, fausseté, malice, desobeïssance, que la condition du Parlement estoit à regretter d'estre si mal recompensé de sa fidelité: aucuns adjousterent qu'à la fin des Remonstrances, le Roy seroit supplié si son Parlement estoit coupable de ces crimes, de le descharger de l'exercice de la Iustice, ne pouuoit avec honneur vacquer, estant non seulement accusé, mais condamné par cet Arrest de trois crimes capitaux, & receuoit les officiers d'iceluy à luy remettre leurs robbes, bonnets, & chapperons. Ceste parole assez mal receuë de quelques vns, interrôpit pour vn temps les opinions sur vne plainte que l'on faisoit, que les opinions n'estoient pas libres; & y eut vne grande rumeur, laquelle apaisée,

on continua les opinions. Tous se plaignoient aussi de quelques vns, qui pour acquerir le vent de la Cour, & quelques faueurs, rapportoient au Louure à des Seigneurs, tout ce qui se faisoit & disoit en Parlement, & les opinions particulieres d'un chacun, qu'il n'en falloit aucune autre preuue, que ce que la Royne auoit dict, que l'Arrest du Conseil priué, le dire de monsieur d'Espernon, & tout ce qui s'est passé iusques icy. Et examinans l'Arrest du Conseil, soit en la forme ou aux fonds, & aux paroles, plusieurs trouuoient à redire, & ne le iugeoit on pas digne du lieu d'où il pattoit, & du lieu où il estoit enuoyé. L'on prenoit diuers aduis, les vns à supplier le Roy d'excuser son Parlement de proceder à cét enregistremēt, qui seroit luy faire vne notte & vne offense irparable, se contentant de la lecture faicte par son tres-exprez commandement, & par grande obeyssance, sinon, qu'il pleust au Roy, pour garentir son Parlement de tant de calomnies dont on le charge, permettre que l'on entre au particulier, pour iustifier les Remonstrances qui sont vrayes Sur les opinions l'heure sonna,

Le Iendy quatriesme, la deliberation continua en diuers aduis; les vns de dire selon que l'on souloit anciennement pronōcer quand les Roys enuoyoient des Edits que la Cour ne iugeoit pas bons, que nous ne pouuions, ne deuions enregistrer cét Arrest, ny la commission, qui est vne fort ancienne & accoustumée response du Parlement, pleine de Iustice & liberté, pour arrester le cours des Edicts pernicioeux, à la foule du peuple, & ruyne de l'Estat, de laquelle aujourd'huy l'on n'vse plus, s'estant le Parlement priué depuis peu de temps, de ceste genereuse & vtile liberté, necessaire pour la conseruation de l'autorité du Roy, soulagement de son peuple par sa facilité, de laquelle ont abusé ceux qui ont tenu les princi-

paux lieux, ou pour acquerir les bonnes graces de la Cour, ou que cela nuisoit à leurs interests particuliers. Plusieurs estoient d'avis, adjoûter aux autres qui alloiēt à Remonstrances, de supplier le Roy qu'il fust informé du contenu en icelles, & commander que commission fust decernée à son Procureur General pour en informer, & au Parlement faire le procez à ceux qui se trouueroiēt coupables, Surquoy l'heure sonna. Et d'autant que le Vendredy estoit le iour destiné pour la pronôciation des Arrests generaux, & aller aux prisonniers à la Conciergerie, & au Chastelet, comme on a accoustumé, la deliberation fut remise apres les festes, lesquelles passées, monsieur le premier President fit aduertir messieurs des Enquestes, qu'il feroit assembler les Chambres le Samedy vingtiesme du mois de Iuin, auquel iour il se trouua que cinq ou six Messieurs de la grande Chambre qui auoient opiné, estoient absens, & l'un de messieurs les Presidents, qui donna occasion à monsieur le premier President de mettre en deliberation en la grande Chambre, si l'on passeroit outre, ou si l'on differeroit: l'opinion commune fut de differer iusques au Lundy, obseruant la reigle accoustumée au Parlement, d'attendre vn iour les absens qui ont opiné & arresté, que le Lundy on continueroit la deliberatiō en la compagnie qui s'y trouueroit, & sans remise.

Le lundy vingtdeuxiesme, les Chambres estans assemblées, les gens du Roy entrèrent en la grande Chambre, & monsieur Sernin dist que le Roy les ayant mandez par diuerses fois, depuis que la Cour a commencé d'entret en deliberation sur l'Arrest du Conseil & commission n'augueres enuoyée touchant les Remonstrances à luy presentées, & leuës deuant luy, il leur auroit dit & fait dire par la Royne sa Mere, qu'ayant entendu l'Arrest cy de-

uant fait par la Cour, de faire les submissions au Roy telles qu'elles luy sont deuës, avec tesmoignage de l'honneur qu'elle porte à la Royne: l'exécution de cet Arrest estoit attenduë, & que quand la Cour auroit cōmencé, le Roy rendroit telle responce que chacun en auroit contentement. A quoy eux, qui, comme gens du Roy doiuent dire & faire ainsi qu'ils ont tousiours fait, ce qui va à la conseruation de l'autorité du Roy, & la manutention de la dignité de la Cour, auroient respondu: Qu'ils auciene tousiours receu toute fidelité & affection au seruice du Roy, en tous ceux de la compagnie, & qu'il n'y a aucun en icelle qui ne soit porté à rendre toute reuerence & obéissance à la Majesté du Roy; qui ne loïe aussi de cœur & de bouche la volonté de la Royne sa Mere, & ce qu'elle a fait pour le gouvernement de l'Estat, & qui n'en espere toute bonne conduicte à l'aduenir, dont ils ont rendu tesmoignage: & feront preuue de leur perseuerance par la continuation de leur seruice, pour donner exemple à tous autres subject, & seruiteurs du Roy, de se contenir en leur deuoir. Que sur ce, le Roy & la Royne, par vn bon visage, auoient fait demonstration, confirmée par leurs parolles, de leur vouloir & intention, dont la Cour se deuoit promettre par leurs bouches tout le fruit qui se peut attendre d'un Roy, qui prend plaisir aux seruiteurs prudens. Ce qu'ils ont estimé deuoir représenter à la Cour afin que sçachant ce qui s'est passé, elle y apporte la consideration qu'elle aduïsera conuenable par sa prudence, pour le bien & seruice du Roy. Eux retirez l'ordonnemença à deliberer, & tous en general se plaignans des parolles injurieuses qui se trouuoient en cest Arrest du Conseil, dist, que les Remonstrances auoient picqué iusques au sang ceux qui se sentoient coupables, & apprehendoient la punition, & que le sang qui en estoit sorty, estoit cet Arrest. Plusieurs suiuiuent l'opiniō de remō-

frances, & de supplier le Roy de permettre & recevoir la preuue & iustification du contenu és Remonstrances. L'un de Messieurs des Enquestes, son aduis luy ayant esté demandé, dist qu'il ne pouuoit dire son opinion s'il ne voyoit l'Arrest du 28. Mars & les Remonstrances. Et dist cela d'autant que le bruit estoit grand au Parlement entre tous, que Monsieur le Greffier du Tillet auoit pris & osté du Registre, & l'Arrest, & les Remonstrances, & soupçonnoit-on, voire on croyoit, qu'il les auoit portees au Louure, & mises és mains de la Roynne : celuy qui opina apres luy dist la mesme chose. A lors il s'esleua vne rumeur vniuerselle, qu'il failloit sçauoir ou estoient ces Remonstrances & l'Arrest, parce que Monsieur le premier President auoit asseuré & iuré sur sa vie & son honneur, qu'ils les auoit en sa maison, & les seroit apporter le Lundy, & promit avec toutes les asseurances que l'on peut desirer, de les apporter. Personne ne voulut plus opiner n'y passer outre, l'on fit vne grande plainte contre Voysin principal clerc du Greffe. On luy demanda, on l'interpella de dire que ces Remonstrances & Arrest estoient deuenus, il respondit, qu'il les auoit baillez à Monsieur le Greffier, auquel il n'auoit peu les refuser. Monsieur le premier President luy commanda d'appeller Monsieur le Greffier qui estoit au Palais : l'on fut quelque temps à le chercher, & ce pendant plusieurs tesmoignoient l'auoir veu & parlé à luy Monsieur le premier President voulant continuer tandis que l'on le cherchoit, il se trouua, il vint en la grande chambre, Monsieur le premier President luy demanda ou estoient les Remonstrances & l'Arrest ; il dit, qu'il les auoit en son logis avec les minutes des autres Arrests, qu'il y auoit aportees pour faire faire ses Registres comme il doit : Monsieur le premier President luy enioignit de les rapporter le lendemain à sept heures du matin. Lors

la compagnie se leua, & l'affaire remis au lendemain sept heures.

Le Mardy vingt-troisiesme, Monsieur le Greffier du Tillet apporra à la grande chambre les Remonstrances & la minute de l'Arrest du vingt-huictiesme Mars, que Voysin luy auoit mis entre les mains, & que l'on craignoit fort auoir esté portez au Louure. Ce fait, & incontinent apres les chambres estans assemblees, Monsieur le premier President commanda à Voysin d'apporter l'Arrest, & les Remonstrances, lesquelles deux pieces il luy auoit commandé de remettre ou lieu d'ou elles auoient esté tirees par luy, pour les bailler au Greffier de la Cour, lequel incontinent les rapporta, & furent remises en la liace, & en leur ordre des feüilles du Registre; ce qui contenta fort la compagnie. Al'heure même Monsieur du Tillet vint se presenter, & asleura la Cour, sur son honneur & sa vie, que c'estoient les mêmes pieces que Voysin luy auoit baillee qu'il luy auoit rendu. Ce que Voysin recogneut veritable qui fit cesser le doute qu'aucuns faisoient que ce fussent copies seulement, & non les originaux. Mais en fin la declaration de Monsieur le Greffier fut trouuee veritable. Apres cela l'on continua la deliberation, & alloient vne grande partie des opinions à des Remonstrances, excuses d'enregistrer cet Arrest, qu'il pleust au Roy le retirer, & permettre la iustification, & la preuue de tout le contenu aux Remonstrances. Sur la fin des opinions, il y eut encorés par disgrace vn nouueau tumulte, sur ce qu'il y en eut vn qui seul voulut dire que la Cour auoit entrepris sur le Roy, & qu'elle n'auoit deu ny peu, que cōtre les defenses, se mesler d'affaires d'Estat, qu'on auoit faict des Remonstrances, par lesquelles l'on y entroit trop auant, & autres tels propos qui alloient au blasme du Parlement. Il fut contrainct de se taire, & le reste des opinions passa

fort doucemēt à l'honneur & gré de toute la compagnie. En fin toutes les opinions se reduisirent à toute la compagnie, fort vnanimement, & fut fait arrest en ces mots, qui fut dressé le iour mesme.

La Cour, toutes les chābres d'icelle assemblees, a arresté, que suyuant la deliberation du 1. iour de ce mois M. le premier President & autres, avec quelque nombre de Conseillers qu'il luy plaira mener, se transporterōt vers le Roy, pour luy tesmoigner, & à la Royne sa mere, le desplaisir que sa Cour de Parlement à receu, & reçoit de leur malcontentement; les asseuer qu'elle n'a iamais pensé ny entendu, cōme elle doit toucher à leurs actions, & moins à leurs personnes, ny à la Regence de la Royne; qu'elle cognoist auoir obligé toute la France par sa soigneuse & sage conduicte, & gouuernement, tant de la personne du Roy, que de son Estat; qu'elle n'a esté pousseée à faire les Remonstrances qu'elle luy à presentees, d'aucune mauuaise intention; n'a iamais pensé, comme elle ne voudroit, ny pourroit entreprendre sur son autorité qui l'a fait subsister, mais d'un zele, & affection qu'elle à tousiours tesmoigné à son tres-humble service, au bien de son Estat, & repos de son Royaume; Supplie tres-humblement le Roy & la Royne, de croire qu'elles sont dressées & faictes, non par des particuliers, mais d'un commun vœu, & d'un consentement vnanime, approuuées de toute la compagnie; & de se souuenir que le quinziemesme iour de May mil six cens dix, le Roy & la Royne, honorans la Cour de Parlement de leur presence, seant lors aux Augustins, la prierent, voulans user de ce mot, qu'elle receut dès-lors, & a tousiours tenu depuis pour commandement, d'auoir le soing que la Cour estoit obligee, pour ce qu'elle deuoit à la memoire du pere à elle mesme, & à son pays; qu'ils desiroient en la conduicte des affaires, suyure ses bons Conseils: adioustant la Royne ces mots, Je vous prie les luy donner tels qu'aduisez en vos consciences pour le mieux; laquelle priere le Roy repeta en mesmes paroles: que la Cour de Parlement s'est sentie obligee par ces commandements, à tesmoigner le soing qu'elle deuoit auoir, & dont ils auoient chargé leur

consciencs, mesmes estant coniuuree par la memoire du deffunct Roy de tres-heureuse memoire. Supplie le Roy & la Roynie en toute l'humilité, & submission qu'elle doit au Roy son souuerain Seigneur, de considerer le preiudice qu'apporte l'Arrest qui a esté enuoyé au Parlement, & à son authorité, & à son seruice; De croire que les Remonstrances sont veritables, & que quand il leur plaira les faire examiner, & s'en informer plus particulièrement, elles seront trouuees telles, & les tenir tousiours pour ses tres-humbles, tres-affectionnez, & tres-fidels suiets & seruiteurs.

Depuis les choses en sont demeurées-là, que les Remonstrances, & l'Arrest, sont demeurées au Registre du Greffe & l'Arrest du Conseil n'a esté enregistré.

F I N.